

四庫全書

集部

欽定四庫全書

忠肅集卷十四

宋 劉摯 撰

墓誌銘

潛山黃先生墓誌銘

先生諱孝綽字公裕姓黃氏上世為建之浦城人自其
考徙居于舒州之太湖今為太湖人舒之望曰潛山其
下號丹霞府蓋養仙之所棲幽人有道之所潛先生遊

而樂焉因自號潛山叟而舒人尊之曰先生先生者道
德之號也先生于孝弟有至性事父母竭力至誠而時
察其色辭以為憂喜能如古人所謂養志者侍疾居喪
皆有以過人家貧口衆而制之必均養嫁諸孤女過已
之子周人之窮不計有無往往衣不兼食不屬而先生
處之自如居鄉與人子言必以孝與人弟言必以順所
居人用化之至相詔語曰毋或作非使黃先生知也其
子莘居官每歸省必問今日治事何如使條其狀聞其

當于義理則歎然為之飲酒嘗謂曰吾所以不仕者為
有子仕足以行吾志汝視義利是非可不慎所蹈歟先
生少舉進士兩至禮部遂不應其後天子推恩當特奏
名而先生亦不復起也士之不仕蓋有之矣或厭濁以
遠引或異學以離世或求焉而不得既去而徜徉慙嗟
超脫禮法誦誕宕之言以為歸如先生皆不然仕之志
以其子行之仕之道以其身行之恭順于父母兄弟行
誼信于鄉黨朋友以為是足以盡吾職而恂恂于名教

不知仕不仕之異非孔子所謂孝乎惟孝友于兄弟是
亦為政者歎嗚呼先生可謂純厚知德君子也熙寧三
年二月十日卒享年七十四曾祖鄆祖元吉嘗仕江南
李氏非其好去之有詩名後贈大理丞考覺任殿中丞
仕以清直閭詩益有名翰林楊文公劉子儀章郇公宋
宣獻公皆稱之多與之唱和先生遊世其家尤善書其
法本二王顏柳其配裴氏屯田員外郎求己之女有聞
行後二年亦卒子五男莘著作佐郎蕲藝荀邁皆服儒

能如先生教一女歸國子博士張慎言早卒六年著作
君以書謂予曰黃氏世以仕貧自莘祖不克歸閩而塋
太湖今莘又以仕來北方川路險遠不孝不敢以柩行
于是卜之地得鄆州須城望山而日得十二月之壬申
吉將合塋焉幸畀之銘某久與著作君游而未及見先
生也然觀其子之賢則先生可知也已于是論次而爲
之銘曰

孝哉先生德成諸身施于其家及其鄉人所性在是進

退兩忘以至于命曰壽而康汶水北原安此新宮刻詩
幽石以昭無窮

朝奉郎致仕黃君麓誌銘

君諱莘字任道姓黃氏自少奇穎有器識以文行知名
一時皇祐五年登進士第為揚州天長主簿徙恩州清
河令前時黃河在州境而縣並河歲輸芻芟後河去猶
賦之至是積逋十四萬于數十貧戶都水督責鞭笞不
已六年無可入君條列于朝悉蠲之時遣使寬恤民力

欲一切罷河北驛傳之須于民者君言驛民故當禁而
事繫國信往來者亦何得廢獨可具民所勞費以其數
當稅後朝廷行之至今公私為便使者吏卒過境少有
黃緣為擾必按以法歲饑部使者不肯賑遂發寧化鎮
倉入頗以活秩滿改祕書省著作佐郎知曹州濟陰縣
事神宗即位遷祕書丞廣濟河決勢感乃詢邑人議破
南堤以分水水去病鄰邑君曰此于法甚重其可以累
他人亟自劾韓魏忠獻公吳正憲公暨御史臺更有論

掾知冤句縣事張復禮至請納官以贖之朝廷亦嘉居
意止奪一官免邑人繪居事之魏公留守北都薦教授
國子監丁內外艱服除復前官直建奉院召對上猶以
濟陰事獎勞之除提舉河北常平倉改東路轉運判官
徙西路水沔穀貴奏罷市易司增價以糴免民艱食繼
又賑之遂無轉流遭陝西提點刑獄駕部員外郎汲逢
坐市易事繫秦州詔獄逮三百人久未決主者幸有功
慘戮巧詆先給移逢病于州君方攝事亟遣醫得逢無

恙狀乃檄問所以為不實者主者情見趣免獄不敢少
出入遂得無寃坐徑詣君位謝曰獲更生實君賜也官
制行換階奉議郎召入尚書省為職方員外郎轉承議
賜緋衣銀魚以之求補外知汝州元豐八年今上嗣位
遷朝奉郎以足疾請致仕十二月四日卒于州舍享年
六十五前娶皇甫氏追封永安縣君後章氏封武寧縣
君子三材婺源主簿樞睦州司法參軍杞興化主簿女
二長適朝奉郎王續次進士蔡居厚君事親至孝友愛

諸茅與人交有終始性諒直勇于為義而廉于進退臨
事不惑所謂禍福利害不以動其心聞人善喜切切稱
道其不善亦不能隱必面告之使改常謂天下大分惟
是非黑白爾要不可使淆見小不明則咄嗟憤歎其為
治倣此故所至大有聲而亦或以不得于人事本于
仁厚愛民為監司不事邊幅未嘗置人于法布衣時聞
舒州望江令豐有孚能吏以孚繫獄即馳見轉運使王
素白其寃素立釋之君故不識有孚有孚亦不知也晚

年亦喜論事愛深思遠過于在位者嘗上疏論免役錢
不當及下戸大臣不禁宿謁與人語簡雅有風致文章
豪健潔齊源遠而氣正自集四十卷藏于家曾祖元吉
仕江南祖覺仕皇朝為殿中丞父孝綽號潛山先生以
君仕于朝贈朝奉郎元祐八年十月辛酉塋君于鄆州
須城之望山其父墓次某識君三十餘年潛山之塋實
銘之于是諸子復以為請乃作銘曰

黃氏著姓江表其初有避唐亂閩浦城居逮君皇祖爰

徙于舒既沒而窆遂塋大湖潛山子仕奉親北方終養
又卜汶山之陽神靈安之遷徙何常有美惟君志大氣
剛學以澤之蔚有辭章力善狗義其身可忘謂逢文明
騰凌頡頏誰斯所儲屯閤弗張間出一二已韡其光老
以一郡止于散郎才之不契由古則然有城有室附于
潛山刻詩謨實以詒後傳

太常博士彭君墓誌銘

君諱慥字公謹世為潭之湘陰人祖冕考霽皆以輕財

樂施稱于鄉里君第皇祐元年進士除復州景陵尉丁
母喪服除調復州司里舉為江州彭澤令丁父喪服除
入祕書省為著作佐郎知澧州石門縣今上即位恩遷
省丞移知南儀州事改太常博士熙寧四年七月十三
日以疾卒于官享年四十六君莊重而可親樂易而有
守心無曲思面無徇笑居鄉有行義仕宦二十年有清
槩未嘗問其家有無至和中辰州起事蠻溪調諸州兵
議所以窮討君獻策任事者以謂中國能使邊夷服者

為有思信爾險穴莽谷其民類禽獸不可使而其土不
可耕使吾得志正所謂石田者何事以為我勞今獨宜
有以綏懷之而已方是時喜事功名者皆以為擊之是
已而師老財困朝廷屢遣使者卒如君策彭澤有修山
觀唐狄梁公買田千畝與之于是觀有堂以祠公大吏
欲移其田他觀君請留半奉公祠屢爭不得至以其議
聞于朝卒從之石門得民偽為印者法可以死情可以
生死則得之者免遠官君戚曰殺人以自利歟遂傳生

議交趾歲貢所過郡皆以鄉兵護送民病其騷獨君南
儀罷之君平生不樂為皎然者而歷宦多在偏州荒邑
無事處故逡巡不大振作而其因物有作間見而時出
之者蓋如此嗟夫君之不得其壽也君升朝贈其考大
理評事妣許氏孝感縣太君娶戴氏封永安縣君子男
二子民子中皆舉進士二女未嫁以六年二月甲申塋
君于歸政鄉永寧里土塘之原子民嘗從予游于荊州
也于是來請銘廼為之銘曰

有幽斯宮竅崇阜兮萬古一化孰夭壽兮不瑕其德義
不疚兮斯于博士為不朽兮

范聖涂墓誌銘

君范氏諱遵道聖涂其字也士仕而不知其道也久矣
苟焉者固漫不省可否惟利之故及獨者又頗亢激以
輕去就為事如聖涂幼已得官不肯輕進方且博學深
養有以自得而後起既仕矣有所不合終不詭隨從容
潔身以去夫必欲自信其所養吾知其非無志于仕者

也不枉已以合人吾知其非有求于仕者也進不爲苟
得去不爲矯亢豈不賢矣哉雖然抱其所有不少見于
功用又不得壽而止此古之人于天道報施所以致疑
嗚呼是可哀也聖涂康宣二年用從叔祖祕書監諷磨
補鄧社齋卽歲十一而孤二兄故已夭獨端飭自立事
母李氏以孝謹聞養孀姑于家而與其子游出處友愛
人不見其爲外兄弟也聚書延師友以名教爲樂朋人
之急親朋多賴以濟嘉祐二年始調鄧州須城尉隨改

徐州司戶參軍未赴丁母喪服除調青州千乘縣主簿
令之政多不善君以忠道之又劇以理又爭以義皆不
聽州察其然因從君刺令事君謝不知退而笑曰此豈
我事而我亦安能夠物乎有去而已因鎖其廳舉進士
遂不復出鄉里益治所居闢園圃築室廬水上超然孤
往臨流坐石吟嘯其間世故一不以掛齒熙寧三年十
二月十四日以疾終享年三十八君性寬厚靜重寡言
精識曠度有過人者讀書不為蹊徑務致其極為文章

嚴簡有趣嘗兩試禮部喜事多學至星歷氣數皆通其術篤于朋友忠信樂易久而不渝而與予相好也故其卒也姜先生潛自魯來與其姑之子張君襄經治其喪而使來趣銘君之先自高平徙河南後有官東平者今為東平人此部員外郎諱正顏者君曾祖也君娶故兵部員外郎直史館梁公舊之女生二男德方于是始十歲德恭三歲二女長許歸姜氏次幼遂以明年二月甲申塋居于鄆州平陰縣安樂鄉樊山原先塋之左銘曰

大車六轡載鸞載旂不可以徑寧柅而留往既艱矣又
新其輶嗟惟聖涂誰司諸幽北山礪固君卜先邱聖涂
歸哉閱此千秋

劉子中墓誌銘

君諱常字子中嘉祐八年進士及第補祁州司理參軍
治平改元君上書言天下平治由先朝臨御久德澤法
度所以馴致之以遺今日今命元之意非是宜于本功
所自來慎始昭孝若曰敬之而已時建具說治獄明以

恕多所平宥數與上官相可否事未嘗屈二年七月十
七日享年三十八以疾卒君幼喜讀書長益自刻苦沈
酣出入非若世俗口誦而膚取之者于寢食造次不輒
廢書以為天下之至樂在是而世所謂樂無以易其發
為辭章清拔有思尤長于引古以視今性和靜而疏達
與人交忠信不渝鄉人有過誤者輒不較居官閒則與
士子講學所以教誘之甚厚人大向之以名節痛自砥
礪欲求天下之善以身蹈之冀有見于世而志不就蚤

死其不可悲也哉劉氏濱州渤海人曾祖諱應圖祖諱
為濰州昌邑主簿父諱庚河中永樂主簿世貧業儒至
永樂滋貧流寓四方時為名公大人邀客之博學多識
善教諸子而君弟蒙有文行故門內講習自相為師友
其後蒙被召試校書郎知唐州湖陽縣以不合投劾去
君既沒十二年永樂及母夫人相繼以逝又一年并蒙
亦亡嗚呼其不重可悲也哉自永樂徙河陽之溫縣于
是君季弟頤復晉與君之配李氏及其孤弼直遂舉諸

喪并塋于王屋縣玉陽鄉之北原竇元豐二年七月七日也君所著文三百篇一女前亡矣銘曰

嗟惟劉君其士之良涵茹探履學敏以彊駸駸天驥志騰八方踔足跬步孰有而亡將緊諸理君乎何傷

國博陳築道墓誌銘

公諱修古字幾道姓陳氏自太丘徙東平曾祖某祖咸卿考肅贈吏部侍郎公少嘗舉進士以兄任為郊社齋郎調瀛州樂壽縣主簿改潤州司理參軍丁母喪服除

舉監大名府酒遷定武軍節度推官治平中用薦者改大理寺丞知虔州安遠縣以親嫌自陳徙監海州稅今上登極恩遷太子中舍賜五品服監開封考城縣酒轉殿中丞知博州聊城縣事未滿罷又知劔州尤溪縣事不行轉國子博士羅在京常平米坐法免歸居七年以元豐四年六月十二日卒享年七十一公性孝謹少孤事母夫人無違及執喪鄉人稻之精敏善治事在樂壽民大饑州委公賑之活者十九在大名課溢緡錢三十

萬在武定鞠正疑獄之以不決者自聊城罷縣人遮道
久不得去前從當路爭薦之晚節失官退處里舍和易
寬靜以酒自娛親戚故舊相對怡然無不足色雖老精
力強壯絕過人臨終授治命其子如無疾者嗚呼公尚
何所慊哉初娶梁氏封仙居縣君生子二人男丙服儒
女嫁國子博士聶伯堅而巳再娶何氏封福昌縣君遂
以其年七月十一日塋于鄆州須城縣南留村先塋之
西某祖妣仙源夫人實公兄祕書監諱希古之子以是

知公之詳無若某者丙前塋又以狀來謹序次而為之
銘曰

物有得喪人用笑嘻彼自來去胡轉而隨公以是故失
也安之既康既壽世考所詒

國博陳長孺墓誌銘

公諱孝標字長孺姓陳氏曾祖諱咸鄉祖諱肅贈吏部
侍郎考諱希古贈祕書監公以廕補太廟齋郎調保州
保塞縣主簿光州司法以處州龍泉縣令舉監汾州永

利西鹽得眼疾所謂內障者求醫以歸又二年致其事
除太子中舍英宗即位改殿中丞賜緋衣銀魚今上即
位進國子博士熙寧五年六月五日以疾卒享年五十
有九公性至孝幼失母實鞠于祖母永安太君方氏及
長而祕書公分務南都退居東平其所以奉親自養禮
賓友內外晏然無所不樂而忘其身之疾者由公于子
職盡也于是凡十餘年既居喪而方夫人猶在寢及事
二季父益以謹順聞與諸弟友愛相與以安貧服禮為

事歲時恭慎祀饗自始事迄卒祭朝服以俟酌酒饋食有數有序每獻再拜興俯屏息于几筵如親其覲容而有所受命者至婦子侍御率以祇恪無敢跛倚與朋友久而不渝和易以愛人雖賤夫遇之有禮自祕書公之亡于是三十年鄉里之亟盛亟替朝饗而簞毀者凡幾家至論清白有常能持其門戶則人必指陳氏而稱公曰吉德君子也雖然臨之以義利蓋有不可動者保塞上官或屬以私公謹對曰不可僚友誚之曰以是居卑

非身謀也公曰士窮達得失不有命乎而逆固若是議
法有守不可撓而本之以恕疑者必傳輕多所平宥汾
洲課增衍于格當賞矣俄以疾廢而至于此鄉人莫不
咨嗟以善人不得報為惜公少舉進士有聲名善作詩
晚讀佛老書信事頗篤夫人李氏故崇儀使榮州刺史
緯之女生四男昭早世熙熙默皆服儒一女歸鄭儒繼
室夫人之妹封金華縣君先三年亡生一女不育十年
四月二十四日塋公于鄆州須城縣盧泉鄉鄒上里先

塋之甲穴公某長舅也方不幸幼孤實公字之又教之
以俾成人于塋也其可以不銘銘曰

洵惟博士孝悌有儀惟蓄不施惟善不耆惟其命之是
以順之惟德不疵何公之悲

陳仲明墓誌銘

君諱孝嘗字仲明某生十年而考妣棄其孤實鞠于外
祖父贈祕書監陳公是時公以疾退居東平里第將沒
以劉氏孤屬其五子某當時竊自惟念親既不得而見

之終乃幸得諸舅從之其庶幾乎其後長立竊食乎仕
出處二十年間舅氏之相次也者四人獨君一人者在
而以風痺臥家雖然每以事若告假過鄉里時得拜其
左右瞻候其安否語言相問訊尚足以自慰其念母罔
極之意而今又已矣當時之所從吾母之同氣于是遂
盡嗚呼其不可悲也哉君秘書公第二子性謹孝侍疾
執喪能盡其志與兄弟相友愛交人有信義少時讀書
作文辭尤刻苦為詩旁治醫藥陰陽之學將莖患莖師

多拘困自究其書有所去取以從事無逮于禮尤喜佛
書通性宗蓋有自悟者其論雖禪學老師往往為屈故
恬矣安分無慕乎外初祕書公為尚書屯田郎中年六
十得疾求致仕以恩任居君曰大人小疾輕去而為其
子計某未安也公遂分司南都曾祖諱咸鄉祖諱肅贈
尚書吏部侍郎祕書公諱希古君娶馮氏龐氏子男五
人曰浩曰湜曰冲曰淳曰洵皆舉進士浩冲常舉計偕
七女子二女嫁四幼子一在室君之亡實元豐五年七

月三日享年六十八遂以其年九月二十八日塋于鄆之須城縣盧泉鄉先塋之原合以馮氏銘曰

嗚呼陳氏遠有德祉中嘗振顯報施未侈逮君之世寢微弗興而以孝弟鄉里滋稱學行恂恂視其諸子德後必昌庶將在此

陳行先墓誌銘

君諱孝若字行先姓陳氏東平人曾祖咸卿祖肅贈吏部侍郎考希古贈祕書監君資英謹持重有志識祕書

公仕有清節為尚書郎以疾分務南都居里舍教諸子以學君嘗讀書自刻勵矣已而幅然曰親疾而養不足吾于子職將擇其力易而功近者廼獨以治產自任服勤勞躬織嗇始于至微粟儲而縷積之闢田桑以植本又有所懋居以化有無蓋其性仁故知所取予智故知所變通信故能交約故能持居久之遂以富稱鄉里自祕書公捐館久其叔若兄仕不達兩兄以病臥家食口滋衆緩急皆賴居以濟鞠養叔兄孤女以禮嫁仕族舉

大喪六七莖之人有所謁隨事周給至于自奉養簡儉
不易儒素晚年薄滋味嗜好益澹泊向有所營殖者皆
寢不復為故嘗觀君之于財其所以生所以用與所以
守者其道蓋出于此則與夫詐力貪刻賤義故欲乞厭
以為富者甚異矣喜讀佛書談性命疾革不亂自制棺
圖像遺其子而卒元豐三年四月十日也年六十娶楊
氏尚書比部員外郎歸一之孫子三人長男女皆亡幼
曰慥孫曰詡說其年七月十一日莖于鄆州須城縣南

留村先塋之西某妣陳夫人富祕書公長子方先君官
湖南祕書公為遭君從行逾年先君夫人繼棄其孤其
孤既幼喪事皆君治之及某依外氏為學至長立得官
所以成之者君之德居多于是前塋慙來請銘銘曰
積惟仁用惟義饗惟吾之力又自居其薄曰毋浮吾德
嗚呼尚哉昭之幽刻

宗宗室慈州防禦使宗博故夫人普寧郡君郭氏

墓誌銘

夫人郭氏曾祖輝贈太子少師祖守文贈尚書令譙王
父崇仁贈安國軍節度使夫人幼失怙恃養于寡嫂王
氏逮成人奉其嫂如所生年十八歸于皇叔慈州防禦
使宗博夫人性仁惠端靜奉姑舅以孝接宗親以禮撫
羣下以恩輔贊君子休有令德累封普寧郡君熙寧三
年十一月二十五日感疾殞于寢年四十一一男一女
皆早世訃聞上震悼恤禮如等竇慈宮嗟惜為之出涕
遣內司賓中貴人庀事殯于京南奉先之佛舍明年七

月十四日墓河南永安縣之塋有詔詞林為之銘曰
展彼夫人柔溫靜嘉萬魂奄忽戚里齋嗟西原瀕逝行
楸霞靡勒銘幽堂淑聞不已

壽安許夫人墓誌銘

壽安縣太君許氏贈諫議大夫黃公諱珙之夫人熙寧
七年十二月二十一日以壽終明年春其子太常少卿
師道泣以謂某曰吾少時被夫人教曰黃氏世積德善
將必有發豈不在我之世爾曹其可以不學即佐先子

教訓頗力其後吾仲弟師說早世獨與季弟師旦以進士同時得科名起家就仕獲以祿養師旦既以都官員外郎終吾日懼衰薄無以奉夫人令不孝夫人既亡將塋矣惟是幽宮之銘以累子其母辭方是時某謫官衡州且三年因詳得夫人之行夫人世衡陽人其父勝好施有遠識衆以長者尊之夫人為女善事其父母為婦又善事其舅姑睦其族姻內外無間言諫議公喜賓客食飲其門者無虛日皆夫人身自供具內治不苟上下

安之二子寢貴顯饗封受祉更仙源仁壽長壽三縣君
以及今封晚年不樂出鄉里太常公為請近郡又兩監
南嶽祠遂居里舍以便奉養晨夕省視竭力致誠察其
願辭以為休戚歲時率婦子孫曾奉觴執膳為夫人壽
夫人顧之喜每合燕親族笑語酬酢終日無倦閭里于
是咨嗟嘆慕凡語門戶之慶者莫不指黃氏以夫人為
有備福而稱太常公曰孝德君子也夫人性慈仁尤喜
佛事誦其書凡十八萬卷有奇平生少疾將終神明如

常時言語不亂名族屬持其手各有所囑安然以逝嗚呼人之所慕而難至者壽既壽矣或耗昏疾若淹淹不支不然嗇其子孫幸而有之不克肖似若夫人享年八十八身終康寧有子甚賢一女歸士人孫曾男女至三十人而補仕者五人皆材良自立嗚呼夫人可以無憾矣是年某月某日墓于某鄉某里諫議之塋銘曰

女婦惟孝母也惟仁惟睦惟則以馮其門福施厥德天畀之年有子惟卿由教則然定省左右綵服華顛及其

三世說說在前豈無智達或累死生臨此大故夫人不驚嗚呼賢哉世攷斯銘

仁壽趙夫人墓誌銘

知恩州事尚書比部郎中王君諱荀龍之夫人仁壽縣君趙氏上世洛州人自曾祖羽徙博之聊城祖韜父繼永皆不仕伯父繼昌事太宗祇候閤門任事北邊有威名夫人幼善事父母既嫁其姑路氏有閨行而嚴正少可惟夫人能得其意及將終語人曰始吾兒早孤求配

常危慮無以成王事者今得吾婦死瞑矣後比部居寢
顯夫人益以禮自約每臨居養之華美者未嘗不戚然
興言念其姑之不待饗而已乃有此也愛諸子均一人
不覺其有異出者比部當任子欲先諸從子夫人欣然
成之養孤族子數人于家恩意無所間蓋婦人之行于
是為甚難而夫人優為之平居寡笑語御家有法事至
雖煩而徐應之必中理日誦佛書以為常性寬而正故
人或可以欺而不能以妄說之也嫁三十七年年六十

一元豐二年十一月三日以疾卒于其夫官舍初封孝
義後更令封生三男子長嚴叟河陽節度推官監晉州
煉礬務好學有節行次瀆叟堯叟六女嫁者四人其二
與次男皆早亡孫男女七人明年三月日葬于濟陰廣
武原之先塋銘曰

孝至于不忘其親愛至于不獨其子厥家日興不享祿
祉是惟令德而壽此止貴孰共之欲養不俟夫哀子慕
嗚呼曷已

吳郡君墓誌銘

濮陽郡君吳氏世家撫州之崇仁縣贈太常少卿諱錯之孫故都官郎中諱有鄰之子故給事中天章閣待制致仕郭公諱申錫之夫人郭公始娶陳氏實為我妣之妹既蚤亡而再室夫人某以陳夫人故數出入拜夫人今諸子舉公夫人之塋而以銘見屬誼不可辭乃為銘曰

懋惟吳宗篤生夫人其字道卿其名嗣真幼不戲嬉獨

近文字性敏以勤有誦輒記至凡女工不學而能事親
克孝善養善承父母以是賢之篤愛好逮亦多慎擇厥
配二十八歲乃始有家不逮事舅姑壽則遐承顏順辭
始終不替藥劑膳羞必躬乃饋陳氏有子六人皆幼夫
人撫之已子不後陳氏兄弟間至猶昨夫人遇之已族
不薄給事立朝侃侃言路不以家卹夫人之助謫官濠
梁不以憂戚姑尤安之以時分力居姑之喪哀毀不勝
廬居墓下又以孝稱自其為女為婦為母動止有節言

語不苟持循家法不以智更諸子自教卒俾有成內外
睦姻法度妥妥尤喜事佛晚並不情治平五年從夫河
中九月十八日感疾以終壽五十一弗克永年行豈不
淑而報乃愆有男禮立主將作薄女亦一人嫁宋文虎
居仁和縣郡封濮陽既歿七年給事亦以熙寧八年仲
冬一日遂合陳氏從夫幽室嗚呼夫人始卒不虧直詩
厥美以永孝思

李夫人墓誌銘

夫人李氏東光人贈職方員外郎昭度之孫故崇義使
榮州刺史緯之子故祕書監陳公希古之冢婦故國子
博士孝標之妻而某之舅母也榮州本以儒者進當鈐
轄廣東守北邊更數州皆有勳績始與祕書公相友善
夫入數歲嘗使出拜而約之婚年十八乃歸焉既不遠
事姑而祕書公以疾退居里舍者十年凡其食飲夫人
非自烹鉶藥非親調皆不以進疾甚則出其奩中物以
有所祈請無不至及居喪哀毀過人方是時祖姑永安

太君方氏在寢祕書公二弟博士之弟四人族屬蕃大
而門內之治夫人實主之上事旁接各得其歡心卻下
雖嚴而人愛之博士于祭祀特兢慎夫人克相成之既
恭孔時性聰明曉音樂略知書翰事佛甚謹皇祐五年
七月十三日以疾卒于光州其夫之官舍年三十八子
男五五人博士既賢夫人而未嘗忘孝氏也故以其妹
繼室而仲婦又取其弟之子夫人既薨八年當熙寧五
年博士亦亡其子熙以七年某月日合葬而取銘于某

某幼孤蓋依夫人以生者也是宜銘銘曰

循法度共祭祀惟夫人克有是德不愆壽不侈塋從其
夫永安此

贈刑部侍郎孫公墓表

公諱成象字乾曜姓孫氏世家長沙五代末馬氏據有
湖南將吏皆其所自補公之曾祖全以材武為潭州醴
陵縣鎮過使庇愛擇惠當危亂中衆恃以休威實有德
于一方生匡翊始仕皇朝為揚州廣陵主簿以清白著

名生雋隱曜潛行治居郡城南輕財樂施教子有方里人以為長者而湖湘衣冠論凡治家可法者至今指城南孫氏是為公考生子五人而公次居長性篤孝事親能竭其誠力而友其弟以愛居父喪致哀謹禮鄉里稱之好學問為文章長于歌詩善書有法有名場屋間聞善見義篤好而力行之娶夫人李氏家多貲嘗析其屋同門壻以女分每將有訴公曰婚姻以利末俗事也而又訟乎是非士人之所為因謝絕之後以事出旁郡

而母夫人以疾亡既還伏棺悲摧累日不能飲食忽撫其子曰吾不為無後死當免于聖人乎其從先君遊無所恨語已號頓而終年三十三天聖元年三月二十七日也夫人後公二十四年卒二子頌今為朝議大夫荆湖北路轉運使顯守桂州靈川縣令一女適進士丁咸孫男四人曾孫男六人朝議君以才顯于世自其升朝每國家有事劾廟推恩其子以及其親于是累贈刑部侍郎嗚呼公雖無所饗于其生也而歿也被名爵燕世

緒子榮而孫承之則為善必有報顧逕疾異焉耳公既
歿二年十月二十三日塋于郭下鄉露仙里又五十三
年當元豐四年三月二十七日開封府推官奉議郎充
祕閣校理劉景以文表于墓夫人李氏萬年旌德縣太
君自有誌銘嗚呼公之死可謂過于厚者也古之人制
中以為常然亦曰喪過乎哀雖過而不可議者厚故也
公視其子足以立知其不為無後而死則公之志可哀
也而不可議也夫厚其親而死人莫得以議斯可以無

憾矣而猶有可哀焉誠在公有高于人者未及施而止
獨施之其身而已此其命也夫此其可哀也夫

祭文

滑州祭鄆國公文

自夫子沒邪說肆行歷歲百餘而孟子出以身徇道于
是夫子之道明人到今師之歷世緬邈弗知所報國家
選講師設科目以其書繼五經後又詔封鄆國公配享
夫子廟位究國公之次學士大夫頓首幸甚以謂是夫

子之心也州以詔令從事將擇日置像位焉敢具昭告

祭丞相韓儀公文

維大觀三年歲次己丑十月壬申朔初二日癸酉奉議
郎武騎尉彭城縣開國男食邑三百戶賜紫金魚袋劉
某謹以清酌庶羞之奠祭于故丞相儀國韓公之靈惟
公氣間堪輿秀鍾嶽瀆來輔昌運協興盛福自結明主
孰云臺卜高陽開府初叨采錄及長天樞復備僚屬飲
食教誨始終樂育卒議姻好不遺寒族逮于南遷仲婦

晝哭雖反于室公曉彌篤瘡嶺蠻陬問遠以續高誼仁
心迥出流俗疑承得謝脫屣寵辱樂適恬養淡然自足
天下具瞻曰僕還復衮衣龍節匪暮伊夙天難詭斯云
何不淑哲人已萎百身寧贖常水之陽西山之麓鬱鬱
佳城吁嗟埋玉樂辭告哀曷展心曲

祭沈太常文

惟君之生冥孰宰持才高而莫致蓄大而不施世之人
徒愛其外之英華兮曾未見其其中之礪礪好之者雖衆

莫能以力兮惡之者亦足以顛擠惟古人之莫不爾兮
亦惟君之所自知

祭趙元考文

維某年月日某官某致祭于故翰林趙公元考親家之
靈惟公德行之稟兮清淳而精粹學問之積兮該通而
博備自文字以來兮前言之與故事雖幽渺詭祕兮因
散殊之弗記其中無不有兮人名之曰武庫與物未嘗
競兮世推之為國器系靈源之休兮克承厥世覽皇德

之光兮亦華于仕外若可以親疎兮內挺然其志茲俄
鰲翼而南飛兮亟與疾乎澧之溪曾未云更暇朔兮適
大故之从止惟死生固自有命兮公已久明乎此理曰
憂患爲傷其生兮是世以進退爲休戚之言者爾嗚呼
哀哉予與公文兮以濫而成三十餘年兮事予以兄館
閣各途有並游之樂兮婚姻晚契締深好之情駭書音
之來計兮浩哀涕之如傾胡善人之不淑兮儻所謂天
道之誰與明溯沅江兮緬緬望楚雨兮冥冥蘭芷兮香

歌猿鳥兮悲鳴慨予方繫跡于蘭溪之濱兮不得祖飛
旆之東征即寓情于斯文兮代望門之歌歆敬致薄奠
兮以薦斯誠

祭丁上杭文

維元祐八年歲次癸酉二月戊申朔某日某甲子具位
劉某肱故友上杭府君公明丁君之喪墓于鄆之北原
謹遣隨行指使三班借職王穆致肴醴之品而祭之以
文曰嗚呼公明曩時盛年氣狹雲路顧語富貴可以指

取千金盡散以交雄豪志願力命不相為謀爛漫醉吟
清新竒妙天葩寶璣霏落談笑造次居養不啻于窮服
必華潔食必珍豐薦進吹颺豈非知己至其得失誰使
誰尼晚假責侯以紆青綸萬里逾歲亟聞匯還今我東
來燕樂故里魁壘軒昂獨不見子想象生平綢繆話言
磅礴之氣得于遺編嗚呼公明紛紛古人才不盡偶惟
有所傳恃以不朽獨念子世寢微寢艱客骨地上垂三
十年為子買田北原龜食土水深厚佳城吉宅以子之

考及二妣喪劉氏宋氏庚穴之藏子及室邢寵于申位
左右相望冥豈不慰不易舊歛周以重棺日時協良歸
哉惟安嗚呼公明誰語皎皎沒而無知來歆罇酒副此
悲思

熙寧九年祭先塋文

維年月日孝孫男某謹遣新婦任氏長男跂躬詣先塋
之次用某日具清酌庶羞致享于三代考妣之靈惟某
幼而孤流離四方弗克踐先王恭信哀三禮得罪于上

帝神明不敢違乃天實悔禍保佑先人緒餘弗俾失墜
以活其嗣人猶傷于貧三十年于茲始克大事如是其
在某之身何有惟心以率力守視洒掃恪恭于麓次終
以報稱先人則曰豈敢如以自竭其愚則曰庶幾哉然
方有罪于朝爲世大僂志弗克遂又五年于茲雖曰哀
疚繼之以疚其心惴然而官禁有誅祈天天高亦罔克
有濟蓋蚤夜惟念古之人有禮祭祀欽承婦子是賴用
敢祇承禮意命之從事以代不肖之身明德加惠尚願

歌茲乃若敬念所願則忠心如是終身如是曷云敢忘
曷云敢違


祭蹈文

祭于比男奉議二郎之靈惟汝孝于父母善于弟兄行
已應物一以至誠橫逆不校憂樂不驚少自刻苦以取
科名安其所僚克有厥鼓士林同詞期以公卿嗚呼哀
哉德吉氣靜此壽之理吾謂異時必將賴爾天胡奪之
遽先吾逝白頭衰年哭爾壯子事之顛左有至于此嗚

呼哀哉書來報疾汝批紙尾凡數十言常時無異云偶
大病十去八矣醫言無他數日可起本不馳告念非得
已地遠思親願遣一弟意諸昭昭有叙有紀但怪所書
多不成字中心悶默憂恍如醉亟遣醫先翊日訃至嗚
呼哀哉天之賦汝亦既粹美反嗇其生使不少俟冥誰
宰持必有所以豈曰偶然自生自死殆吾不修業惡積
累罰鍾汝身汝則何罪聞汝臨終妻孥守視汝父汝母
汝兄弟妹無一在傍四顧歔歔若有所屬索筆與紙手

不能持強語其子曰幸千萬可獨寫此嗚呼哀哉又聞
前年赴官遼邨出門傍徨密語二季曰此行後忍不自
意安得休哉同此庭侍祝勿告吾懼詔親累豈汝自有
所知魄兆已至使吾蚤聞必留汝止而不吾告何所牽
制嗚呼哀哉又聞初疾風震為厲頭目痛昏火壯軀體
付之庸醫語為腳氣諸所毒藥連投大劑一晝夜中數
十下利陽脫陰輻外浮中痞寢以滑泄上益嘔噦才十
餘口摧此魁壘至于大故神不亂昧醫乎不仁殺人何

易數雖有定豈無冤者嗚呼哀哉入之有生會歸于無
浩浩萬古瞬息須臾其間長短何較錙銖古之達觀宜
此萬殊禍福同戶彭殤一區忘情齊物與天為徒吾視
斯人豈無愧歟情累纏著若有根株八月庚申見汝喪
車慘慘儀象累累纒麤鼓慟親友歎聞道途天高神幽
吾哀莫呼江盡海竭吾淚有餘鬢髯面目嗟何及乎惟
有盡心撫汝諸孤松楸之下一室山隅以候歲月歸汝
先壚



欽定四庫全書

忠肅集
卷十四

忠肅集卷十四

欽定四庫全書

集部

忠肅集卷

十五至二十

詳校官庶吉士

臣張溥

檢討

臣何思鈞覆勘

總校官進士

臣程嘉謨

校對官檢討

臣王福清

騰錄監生

臣李晉

欽定四庫全書

忠肅集卷十五

宋 劉摯 撰

五言古詩

讀書

西風入梧桐白露下雲漢灑灑晚秋色清涼復神觀
歲月不我與料理前日慢念此平生心所樂在黃卷太羹
與玄酒梨棗及俎簋滋味要足口更復恨未見燈火夜

可親巾箱字甚憚紛紛事是非碌碌世治亂千古守糟粕未免斷輪歎聖賢有堂奧大道堪夷坦是為名教樂足以了衰晏惜日營珠金投身鶯歌管彼志各自言難以一理貫

老子畫象

敝周儉于文老子談大道仁義已末流體法固行潦虛無抱玄珠清淨為至寶培斗息羣競死聖止大盜謂可愚斯民狂瀾復既倒不知世大變萬偽火就燥欲以區

區言反俗入義吳渾淪五千言道德何浩浩漢當求其
說施用未深造衣食已有滋煩苛以能埽惜哉衰世士
學術失探討流而為刑名慘礪極枯槁但見多申韓舉
皆罪黃老聖人無常師有善取與卑問禮固有然誰謂
孔徒小遺貌知是非君無論醜好

雜詩六首

四序若轉轂萬物變秋風蕭騷簷邊月赫赤江上楓寒
鴟坐晴屋陰蟲淒暮叢靈鳳杳何許寂寂朝陽桐

咬咬籠中鳥食飽勤好音誰懷主人意豈不思上林出
處謬前算老大故谿心秋衾耿寒夢玉露曉如淋
古人有高志妙與天地通讀騷飲美酒揮弦送飛鴻杖
藜步梧竹閉戶閑僕僮禍福有倚伏念當守蒿蓬

我思彭江州行已有風績與善忘吟哇魔邪立崖壁堂
堂生民望奄奄斯道寂何時持鷄酒就子墳上瀝

播州遷劉郎夜郎放太白秀木風所仇人情有欣戚嚴
霆無終朝斯文豈遂厄我願蘇與黃壽命等金石

至人有神遊坐凌八荒邈一息如鵬圖萬里御羊角萬
萊彼頻頻晨夕自喔喔仙人喬與松誰云不可學

西齋觀雨

長庚謝餘炎大火躔西極開軒對朝雨拭目看秋色雲
空相晦明風縷乍斜直聲繁自飄蕭勢急勿淙激方塘
潛浪潮萬瓦亂珠射巢燕倦翩翩庭蕪長紛籍閒花洗
幽素秀木舞涼碧清氣醒筋骸餘爽入几席跡希蔣翊
徑興高陶令宅繞郭聽懽聲登秋飽豐澤良辰感孤官

念我久行客窮年不自樂心跡兩何益功名羞詭奇歲
月易類斥聖人堂有奧大道坦可適胡為世俗間區區
較尋尺

縣齋秋日雨後寄李聖和

置閨歲八月祝融冒秋權當代不肯歸滯暑歎以延金
行奮剛義天令懲驕愆一雨惡氣死百物疲瘵痊陰陽
戰既定灝氣蘇天淵犖斂物得性豐給民有年小軒占
幽寂危坐涼脩然身如赦炮烙蓬山弄飛泉冷風嘯梧

竹清響搖碧鮮淨几少喧蠅
高簷除嘒蟬煩心爽已蛻
塵觀清疑仙于茲飭前懈
圖書獵陳編晤言隔朋類披
卷盟聖賢樂此懷高風北望
心悁悁

縣北馬上

五月暑雨過緩轡來城陰
朝暉粲林莽涼風弄衣襟敢
辭鞭策勞邂逅得幽尋斯人
勤歲事樂此膏澤深
芄芄黍稷藹藹桑柘林田翁
可指食蠶婦期織絰相儲與
衣褐卒歲無崎嶇陶民帝有
力養物天之心忘言樂其

樂此意良自謏紆為馬上句比和擊壤吟

答黃草任道代書見寄

吾生本放浪自比林壑人謬此紕官組試邑漳水濱疆
田占瀉鹵戶俗籍羸貧驛涂搔左臂河流齧西澹役者
動淪產居者無儲糶科求困府調期會嚴吏文儒生仕

學古志在膏斯民慨歎適于此蹉跎徒自勤亦嘗紆厚

斂粗自窮褐溫

原注南宮夏稅折色視他郡最重前歲特為申請乞隨市直估折不用諸色得

音觸三
分之二

勞心米鹽屑東筆朱墨紛尚賴厥俗古樵然猶

朴淳因時罕訟訴得以親舊聞瞻言君子治百里相依

瀕厨傳候使介南北交歡忻議和六十年中國勞勩耘

脂膏瘠黔首歲月如轉輪寸金比寸土石晉真自焚祖

宗赫大業此願嘗經綸遺憤鬱未泄壯士常云云天運

無盛衰吾民繫康乇遠御在廊廟勿憚躬觴殮小官惠

不耻委吏孔所伸

原注君為清河令當信使驛路時有供饋送迎勞困之嘆故云

我亦

走除道折腰邊馬塵緣茲有境會每得言笑親代去各

匪遠木落秋風辰知倦黎侯寓來卜子騫鄰

原注君始寓衛州今

見詢欲謀
居汶上

東平我客久蕃阜誠罕倫齊魯儒學地遺風
今尚存禮讓行比屋弦誦傳里門玉京輦路近霏煙望
氤氲梁岑聳秀概回源號通津炊玉北陂稻繪霜南浦
鱗名園富夏果冬山下寒薪滋味閩越足物色吳楚賓
人物盛著錄衣冠若雲屯交朋三數子英英鸞鶴羣文
章與言行玉潔芝蘭薰方舟洞庭雨載酒樂郊春羨君
此謀吉不必龜筮詢我馬固已秣君車亦宜巾瑤音枉
嘉問凌紙天葩芬聊茲締里社愧匪金玉珍

中秋招趙湜

浩然天地秋涼風日蕭索憲也固非病回焉不改樂公
秣已堪釀兵厨有近約以此邀子車主禮豈云薄

送趙湜遊邊

風霜日夜肅關寒塞草白之子倦蓬蒿結束遠行役尺
劍有壯懷短褐無寒色禮臺多黃金義橐富白璧河山
數千里趙魏繚遺跡大事今在邊為我盡覽歷威懷用
表餌是非入奇策豈如滎陽秀出以屢空迫

白鷺亭

危亭跨城巔因洲名白鷺開軒二水上寓目萬景赴風
濤
鰐魚龍煙雲變汀渚孤禽點鍾山片席下吳浦閒人
得閒愁憑欄歎今古脈脈臨長江寒潮自來去

過彭澤

孤舟倚彭澤高節懷淵明餅粟曾幾許忽歸無留情士
生于內外貴識所重輕山高暮寒聳江闊春風平弦歌
絕遺響秫田今誰耕我方事奔走嗚呼愧先生

庾信宅

南都號多士庾信乃辭客承家富縑緇摘文爛組織應
教來春坊日坐學士席翩翩宮體謠江左變風格巨盜
掀臺城狂飈鍛孤翮南飛江陵宮杖策赴王繹經綸投
中興感憤補天隙大厦豈一士終此陽九厄陸機趨洛
陽夷吾入齊國濯足聊委蛇懷邦已悲惻惜哉不遭時
渙忍無偉績王室與身世淪離兩何益暮齒哀江南聊
將賦心跡楚郡故城陰或云此遺宅寥寥舊山川莽莽

新黍稷是非不可求
秋風暮烟白

馬融絳帳臺

東京尚經術人皆挾師才
惜乎章句間門戶各異開
馬融號耆舊太守南郡來
橫經坐絳帳自處何崔嵬
帳前列徒弟後歌絃陪書生
貧賤志遽以聲色回于今數
百年歸然但高臺舊址半傾圯
欄檻生莓苔溪光貯襟袂
南風熏樽罍高簷日向暮
燕雀亦徘徊

題公安知縣柳應辰屯田默庵

語默本無常此道知者寡君子默諸心志氣納陶冶至
神所安潛可使萬物化精微與道契密不見纖罅世俗
默在口鈴若偶人者至其中所驚逐逐散萬馬我來觀
默庵虛白非外假天地冥毫芒今古一晝夜物至紛無
窮酬酢甚閒暇清淨老叟燭寂寞揚氏駕養此將有行
性命妙天下相對坐終日心愜如喙炙賦詩尚何言聊
為默庵謝

寄題柳郎中留客酒

主人真愛客留客徹歸路清溪環醉堂客起驚四顧人
生異智愚所急隨所慕僕僕聲利徒晝夜無息慮雖有
此不樂身留意已驚惟同主人心乃知此中趣主人韻
瀟洒恬不役世故對物心有忘簡言理自悟清風元紫
芝令德黃叔度即之久益親不知變朝暮況復樽有酒
琴奕左右布魚鳥馴不驚孰與醉妖嬈主人意于客可
謂甚無負速應架溪流坦坦堂下步客至不須留聽客
自來去

次韻王潛江見索近詩

與子一睽索俄經百朝昏塵勞觸新累病懶荒舊聞強
之旋放失殆若溝瀆源新吟妙思致天葩發靈根澹然
體大雅理愜如忘言鼓旗締友社壯志壓僅存譬以趙
魏弱仰關支秦軍君無疑散索惹改非珠琨

送鄒澤民還澧陽

人生寡會合世路多舛機吾得二三友老鈍諧所依澤
民氣閑侈詞筆如戈揮狂鶻但思擊生馬不可幾彥修

韻寒苦獨以經史肥捩眼鄙俗調據臂談聖微直夫名
流子學性無愆違冰玉瑩表裏芝蘭自芳菲嗟吾實款
段騏驎安可希清樽寫江海日獲從西圻吟鋒互矜軋
醉笑相嘲譏方懷青蒿愧忽見黃鵠飛明哲慎所蹈勿
與媼繳幾秋風病池榭苦雨沾裳衣行矣歲華晏重感
人事非玉音儻無數時有北鴻歸

次韻晉陵吳秀才傳見貺

予本疎野人出處心已果孔患四未能嵇慵二不可長

年足憂勞中懷辛安妥風瘍臥疲軀手足困攣跛思君
淳乎淳處俗我為我玉軫黃金徽手開萬古鎖天地自
然聲聽者不敢情君有元氣舟微風以為施我亦薄外
機庶不撓世禍儻伴荊州行春江醉輕舸

荊門軍惠泉呈李使君舜卿

蒼山抱西城蒙泉發山麓一泓養虛淨大石圻巖澳源
脈漶漶來星珠沸相續何人瀦方池不使聲瀑瀑四圍
疊琳琅百丈蔭雲木波底金蓮花萬葉綠綺緝畏清無

魚蝦因亦遠鷗鵠俯視洞五臟安敢濯兩足循池隅西
南漸見泄泉瀦怒聲始可聽勢如脫桎梏涎沫卷飛練
激鳴射碎玉曲折谿路長幽響遠遠連屬安得朱絲絃為
寫滄浪曲派澤山下田歲常稔麴穀憧憧負餅盎清入
郡人腹惠名由此歟圖牒曾不錄崔碣饒文章無數不
暇讀亦欲有佳句恐為惠泉辱使君心自清館宮泉上
宿一勺蛻塵軒豈比樽酒淥磅礴壯士氣常為山水伏
天下幾林泉無金買卜築空茲嚼屠門野人真碌碌

煎茶

飯後開都籃旋烹今歲茶雙龍碾圓餅一槍磨新芽石
鼎沸蟹眼玉甌浮乳花詩思一坐爽睡魔千里遐茂陵
病解渴頓覺肺氣嘉玉川風腋興直欲凌煙霞論功著
為經宜得鴻漸誇膏粱麴蘖士此物無與賒

石生煎茶

石生蘭溪來手提溪泉餅謂言長官政如此泉水清歡
然展北焙小鼎親煎烹一杯酌官壽雲腴浮乳英慙非

百壺錢真意不自輕
澗沼蘋藻細王公享其誠
冠蓋豈不至紛紛
空涕橫珍重石子者
端有古人情

游白雲山

西山矜霽色林嶺遡晨光
萬象露榮秀熙然數盛陽
扶筇喜暄暖更得春日長
迴阡互虧蔽叢薄紛青黃
溪橋覺飛動漲水起連航
杳杳巖壑步脩脩松桂香
道人誦所聞坐使身世忘
誰我共出處閒人澹徊翔
風鈴有妙想天樂浮圖傍
非徒愛石壁行將營草堂
彼哉楚人子

記恨擷幽芳

馬當山

馬當天下險崔嵬大江邊翠碧倚千丈峭立萬仞淵其
背領羣岫其麓匯飛漩鬱葱巖間桂窮冬華葉鮮豈無
仙人縹緲居其巔猿猱肆健捷攀躋到雲烟揚帆過
其下瞥若飛鳥然仰觀動精魄但見斲青天吾生媿仁
智而于山水便終日叩舷坐無暇窺塵編有嗜固為累
觸險不自憐

湖溪道中

夜雨聲絲絲朝雨勢未歇行役良間闕炎歊暫祛遏蘋
藻香幽幽陂池水活活咫尺迷見聞淋漓徹衣褐坎泥
甚膠凝膝路無尺闊饑僮與羸驂十步九顛蹙敲鞍髀
欲僵風益手屢脫驚目不暇瞬危魂亦已怛處險貴能
安欲速或未達聖禹嘗輔行文公尚胡拔彼勤事業大
吾勞簿書末香城到長堤軒眉解蹙頰大道吾所歸寧
為險途奪

久雨次路韻

江國多陰霖雲氣所儲積貫月仍彌旬窮朝復竟夕太
陽暗經天莫見黃道迹風霏淋牀帷簷溜穴砌石春澤
農之瑞太甚豈其益人言雨有數四時合均適前多後
將少物理固明白我居苦湫陋安得爽塏易棟梁生茵
苔書樂漬汗液塞漏除泥塗紛紛課奴獲凌虛逃重隄
頗思兩鳧舄坐觀久溟濛風伯豈無責慰彼望歲人私
我窮居客茲事但置之一觴聊自釋

富池口

順風雖宜帆顛暴亦難用浪擁江逆流雲狂日昏霧天
公客飛廉橐籥大開弄蛟鯨快乘時驟首出洪洞舟楫
多深藏灣浦投缺空我行斯可時要當審靜動況復舟
弊鈍羸師困僵凍時止聖所藏欲速禍或中坐期天清
明連檣欣所縱且傾淥酒樽慰此清夜夢

泛舟

湖光漾碧霄飄然一方舟綠船屢還復檀檠雙夷猶雨

色芰荷晚風香蘋藻秋鳬鷗解相信隨橈過前洲落落
二三子載酒相與遊清言愜素尚大笑忘幽憂洞庭醉
淵明剡溪浮子猷人生似飄瓦所願非所求濯纓漁父
達佩蘭騷人愁不須吳姬婉蓮間聽淫謳鄙哉迫功業
方為五湖遊吾曹詩酒中此樂為最優

憶山

昔者氣少銳狂走登泰山東峰候海日危磴躋天關上
攷秦漢事遺文大碑頽南浮九江會廬阜幾往還雙林

到如家瀑布聲潺潺扁舟上湘水南衡若屏環巍閣坐
杳靄祝融費躋攀幽尋恣所適曾不虞辛艱其餘林壑
趣可數皆班班逮今歲十改志氣日已孱前時兩河吏
風埃走青綸荊州乃澤國自昔登臨慳佳山到郢盡平
地千里閒塵耳憶猿嘯屐齒生苔斑安得蒼翠姿下落
樽酒間平生林丘志未去心如瘰去就不勇決將見移
文訕

送吳雍平涼令

洞庭葉微脫，衡陽鴈未歸。秋雲招客思，偏向隴頭飛。
風霜過商郢，飄泊遊子衣。行邁豈不遠，在彼渭水沂。
早寒關草白，九月邊馬肥。西州風俗厚，長官民政稀。
洪河繚勢勝，大山四蟠圍。登臨賦今古，壯志相發揮。
宦遊子誠樂，孤陋予何依。念此性疎朴，動輒觸世機。
相逢幸燭理，義愜不謂非。扶持失其直，曲逢嗟願為。
朋友日已削，道義誰與幾。離騷默自慰，但寄黃金微。

寄潁州顧子敦

念君去南州歲月忽已掃豈無肺腑言難為音書道容
來自汝陰盡說太守好黃堂日無事仁政決椎老承顏
奉親歡甘旨富魚稻時時過西湖樽酒媚花鳥兒童爭
拍手共笑玉山倒都城亦何為風塵驚昏曉投身非所
謀養氣安能浩思君便便腹中有無價寶昔者定交分
我已愧枯槁豈知鴻鵠飛翩然異鷦鷯人生出處間得
失不在早君看松與桂俱有歲寒操何時臨清觴為子
傾懷抱

送僧常蔭

吾師來曲江落落偉丈夫靈標峙松雪清韻輝冰壺談
高文字間欲超仁義途飄然跡無累青天白雲孤振衣
下懷楚遂欲游京都京都貴人多駢門耀金朱仁義卜
知己誰不顧子廬況子兼外學妙達性命樞言隨禍福
應名利惟所呼一出玩世故應憶舊山隅

庖婢病跂自臨鼎俎有詩

塘頭買鮮鱗戢戢楊柳貫不憂一日饑遂可支兩膳北

方貴鱗魚豈異此中鱖但求杯盤充焉問名實眩芼之
薑芥蔬雜以紫萸綫雖非梁肉豪鄉思已過半甘芳漬
蒙茸軟熟分片段佐我新炊杭珠琲光粲粲春羹遠無
慙枯鱗不足羨吾于饕餮衰安此軟煖燕昔人意不佳
多緣噉脯麪聖賢親鼎俎毋庸厭烹饌

夜發白碑

晝行苦炎蒸秣馬戒夜發清夢失歸路微風弄纖葛屋
疎天無雲獨有亭午月太空生白煙浩蕩萬里闊細碎

草木香淋漓露氣滑戚戚寒蟲聲逐馬不暫歇我行何
區區無乃害慵拙傳聞猛虎多宵路時出沒四顧林莽
中精靈動毛髮求全得憂虞禍每乘所忽君子審重輕
無勞避途暵

冬日遊蔡氏園次孫元忠韻

偶來梁宋遊得子共閒冷杖藜古城陰邂逅塵外境恍
思闕闕中喧卑真坎井晴霜蔽陰崖朝暉潤陽嶺田翁
醉年豐曉夕不知醒園逕迎幽尋林屋到深靜凍禽時

自驚古木坐移影憶雪指寒菱占春驗枯梗求田計良
難旅食飽已幸暫得酒中趣詎須求酩酊短景忽催歸
何時後期請

次韻吳戶曹師道秋雨

西風日已肅涼雨霏層陰豐澤飽歲事徂節驚壯心寒
蟲攪夜思滄浪夢秋衾欲謝茂陵病誰憐莊舄吟

題句龍緯職方海棠軒

使君西州客慣見海棠紅影纓出故里揚馬來漢宮醉

當坐乖隔年年夢春風荊州蜀門戶脈脈風氣通此花
何從來根本移化工使君有新第幽寓如山中
小軒面城麓交柯植雙叢年光錦官遠顏色故園同
想當春苞麗無日樽酒空繁豔燒醉眼顧眄增冶容
地勝不在大意適物易充雙輪繁兩朱行將指炎封

寄題定州楊君園亭

隱不在山壑名園抱南城梧竹有遠韻泉石非世聲
林花品莫數野鳥馴不驚主人堂其間對境心已清
舉遺

笑錄錄放言獨冥冥新詩寫閒逸其聲自和平吾嘗攷
風俗燕趙義而誠自古志慷慨其人尚功名苟非勝絕
地烏可奪其行士于內與外罕能權重輕主人不待識
定無俗世情

御史臺柏下有叢竹久荒雜殿中劉中叟洗之監
察孫君孚有詩知雜事劉某次韻

老柏寒昂藏叢篠下紛列未須論晦明均敢犯霜雪塵
埃深蔽埋蕪蔓困籠結槁悴屈子客饑癯伯夷節殿中

秉高義利刃勇分別病穀除蒿粮蝕月救吞齧還君歲
寒姿清風自交徹念昔繞荒欄三嘆生慕悅重來十五
年笑我壯心折幽懷耿相對欲語不得說

觀音院餞送章子平出守鄭州探得近字

大梁三尺雪水泥變塵坐千騶國西門儼若鐘在箕使
君御之行往殿股肱郡玉符佩祥麟車旗舞飛隼去國
雖所懷而在百里近朝方背象魏暮已跨封畛滎陽介
兩京左右事控引咽喉半天下客車日交軫閉關非人

情飾傳古所哂使君錦幘仙才業苦清敏故人毀譽忘
要使仁義盡昔賢此為政遺愛浹微隱國人賦緇衣千
載聲亦泯二者在君興無嗟設施窘

送文與可同出守湖州

東蜀老儒者吳興新使君前更四州守風政超古人歸
來天祿閣袖手隨衆羣一毫不染指世味從甘辛謂柔
未易招謂剛可以親渾然鎮冒器承以縑率文詞章謝
剗剗天葩出靈根冥冥古咸池衆聽所臥聞外物了無

累獨愛霜中筠應憐歲寒節落筆收天真七賢與六逸
林下仍溪濱對之浪狂醉顧豈知此君比年不多寫造
化慳至珍而我得二紙毫素餘清芬留當雪霜展可慰
思慕勤煌煌鐘鼎具未許刊名勲聊復詠黃鵠南國垂
朱輪拔足出埃壒投身當水雲人與境相得長鯨臥天
津冰壺地千里雲屏山四鄰醉月若下酒芼羹沼渚蓴
仕宦子雖適孤陋予何伸曲蓬誰與直坐遠蘭蕙熏臨
風寫高興願寄江南春

天蘇酒成次路韻

粵嶺酒萬戶醕者無刑章以茲于釀事家家致其祥
人亦隨喜聊自慰空觴頗收諸家法曹高及張王不復
使鄰舍更笑甕下狂軟熟秋穉潔芬烈吳秣香垞頭沸
珠螳竿面燈玉漿人情喜自譽謂可官法當方時見初
菊熠燿浮冷黃頽然此中趣不覺鄉路長格高氣淳聖
何至腸腐傷區區美芹意欲以酌后皇餘釀到郡郭恨
無嘉賓將增釀更加數從今百憂忘

食鱠

知幾張季鷹歸懷託江鱠
鱸魚今不數未若魴鯽最橙
齏擣椒蘭蘆葍碎珠貝盈盤玉葉鋪
千縷紅雲碎佐以
晚菰羹玉飯香藟藟飽行慙素餐捫腹放衣帶
昨來溪
夏乾市空無可奈徒有彈鋏吟
何能飽幼艾安得東海
鯨不憚生物害揮刀滿金盤對列酒池外

植菊

春花悅時人賞玩紛僕僕南園一夜風
地上紅盈掬我

似鹿皮翁祇愛晚秋菊團團綠玉叢移赴煙雨斷願言
早芬敷重陽日已促煌煌想金葩況此風露足豈止插
滿頭服之明兩目滋養溉清泉圍護編翠竹多開萬鈴
奇勿變桃花俗酒熟落帽天不作牛山曲

菱角

洪池富水物擘波收紫菱春華雜青黃夏蔓相牽仍迫
彼風露足芒角秋實登剛銛事利觜扶挾如有朋雙鋒
尚可囁四出尤足憎昌歆固有嗜蒹葭非所憑外觀乏

婉軟中質韜玉冰取物取諸內惟彼識者能

朱李

珍果繁西園登盤得朱李白雪凋春花縹九結夏子肉
理漿包寒膚衣粉凝紫細碎輕菱芡甘軟異瓜柿不須
論投報聊復冰寒水伯陽指仙宗房陵詫遺美鑽核乃
獨善王氏亦已鄙味苦吾所幸道旁豈云恥君看齊物
人無用乃天理

行樂

行年將七十衰病乃其時矧茲地氣汾州在大澤陂憶
昨度炎暑林莽居舍卑山色不到眼地無清泉滋晴暘
則鑪冶陰濁則蒸炊氣腕疲嘔洩軀骸醉支離節氣近
寒露生意稍可支故人在秦晉知我窮至斯奩封衆藥
品皆自州土宜形味紫團寶苗榦西岳奇靈如雪山草
秀比商嶺芝是身本無有疾病何用治自愛聊爾爾道
人毋我蚩丸膏或咬咀何復求良醫策杖行東園運動
疎通之收復我冲粹驅散彼邪疵養生固有道一溉非

難為千年鮑昭後復有城東詩

焚香

清泉鑿石餅南海寶洲香下簾隱几坐煙霏散央央春
雲乍凝聚玉穗忽纖長瑞鴨戲歛吐雙臥不肯翔佛國
寶芬鬱仙圃花氣芳真靈格杳冥邪厲毆幽荒安得道
逢人肯顧來此堂說我無上道德音斯不忘

虎枕

未陽得奇枕狀比猛獸姿呀吻目睛轉中有機紐施持

欽定四庫全書

卷十五

鬚世所戒羊質還可嗤莫作邯鄲想曲肱吾所師

忠肅集卷十五

欽定四庫全書

忠肅集卷十六

宋 劉摯 撰

七言古詩

汶上送黃任道游吳

屑霜飛空木葉脫長河波光碧玉滑江南仙客厭塵埃
歸夢寥寥向吳越故溪時到春未還正是梅花弄香雪
太湖寺下吟新詩姑蘇臺邊醉寒月江橙甘熟霜夜酣

吳酌香醇凍醅撥遼東歸鶴悲是非鍾阜曉猿驚契闊
嗟予不得從之行兀若孤鷹歎羈紲東南山水游子多
航深履險無時絕去非賈道百不一寂無風詠十常八
君提吟筆尋鄉邦詞源浩若天潢決形容物象空鰲峯
搜摘祕怪窮禹穴人生難足惟勝游意適何勞計窮達
崢嶸歲律南浦寒早晚歸艍櫓聲軋不獨孤陋勤所思
雙白應須念親髮

秋收

農家之富秋始見十色田利皆豐登擔羸車載上場圃
環舍隱積如高陵園蔬林果不足數山雉野兔霜未增
連村簫鼓謝神貺穀黍換酒無斗升田家之樂豈不好
胡為不歸邀我朋榜舟梁澤家汶北咄哉反此如羈鷹
社日陪祀渚宮退作長句呈聖鄰屯田

楚鄉地薄氣不密寒燠開閉無春冬盛陽不効二月尾
日夜霰雪雨以風社壇汙潦害展祀奠獻絕席移渚宮
層臺大廈禮少變饑羊不去精享通須臾已事雲解駁

象緯落落天曠曠起憑危欄久顧望肅然羽翼開愁胸
恍疑身世此何地蓬瀛岌岌三山宮平湖無波萬籟息
但見橋影僵雙虹豈無林花與嘉木蕩搖摧折今一空
枝頭尖纖卷寒綠水面狼藉浮殘紅荊州獨此號勝地
經年未始來其中黃緣陪祀幸一至豈期端值青春窮
嗟吾老去少懽緒況乃人事多怱怱與君卻作避暑約
解衣岸幘看雲峯攜壺挾策無不可此樂豈特春游同
送客渚宮歸至學舍覽君佩獨登城樓詩次韻奉

和

淵明田蕪猶未歸胡為簿領甘沈迷樂時選勝豈無意
政值一春風雨淒但宜夜几守黃卷酸寒擁鼻燈火低
臧陽充發破陰沴幾日天氣回慘悽朝來送客過楚渚
平湖綠淨凝玻瓈乍驚物象豁塵眼亦有亭榭堪攀躋
草光浮浮古岸北花氣靄靄層臺西盃盤共坐蔭清樾
歌笑起行循大堤鳬雛鷺子漾淺曲絕勝乳燕巢深閨
幽尋踽踽不自覺城陰步滑猶春泥心閒漫隨流水遠

境靜卻憎幽鳥啼何時短艇弄明月安得巨筆凌長霓
歸來學舍坐搔首外物何足干天倪闊疎但愧事業淺
剛褊分與時俗睽如君年少喜學問青雲萬里端可梯
城頭新篇真自得豈假朋友相招攜我亦林泉偶尋勝
因君成詠初無題登高能賦子之職敢以城闕譏挑兮
承牒荆門呈諸友

方城道中詩墨新

原注澤民近沿牒方城有詩

荆門山下有行人同

盟邇來無髣髴傍馬欲去尚逡巡荆門西行一百里玉

泉之境天下聞諸君不能伴康樂請賦黃鵠飛秋雲

次韻王潛江馬上長句因招之

雙鳬飛下王喬縣別後緒言談未遍君能有意齊是非
吾久無心恥貧賤青袍塵滿高情倦急索歸鞭重增眷
陶家池榭雖所懷楚渚林亭應未見

題致政朱郎中适園林

南宮仙郎綠髮翁歸來甲第荆城中翁家祖世有名德
至今孫子傳清風園亭繼繼事營治增華到此窮智工

欽定四庫全書

卷十六

鋪張百物各有職崢嶸一界疑壺宮清明過去春事老
林叢暗綠陰相通朱欄曲檻巧暉映曉風夜露香冥濛
溪魚野鳥樂晴昊碧蘿怪石依長松方城清泚雖可濯
主人縵上塵久空年年三日縱士女觀遊思與鄉人同
及時娛樂日月邁肯使蟋蟀悲晉公閣書深藏一萬軸
牙籤錦帶嚴編封脫巾解屣游覽倦燕坐自有黃卷功
三年羈客偶幸至歸來搔首嗟蒿蓬生涯適意最難事
安用勲業銘鼎鐘鄉人勿笑翁不出門外勢利方憧憧

贈穆道士

離石道士心跡間學行已老猶少年昔游京師友豪貴
聲名成就來淮山恬然頗已厭俗累靖館嚴密諧新安
朝真香火儼畫殿步虛聲謠鏗夜壇六甲星辰逆禍福
一鑪龍虎誰神仙北州有客性疎野誤為世網相拘牽
時來與子款譚晤閒心慰愜愁病蠲曾將出處大計說
聞吾至論頷曰然東風滿江春潏潏孤帆曉掛荊州船
他年會合未可約訪子應在蓬萊顛

次韻晉陵吳秀才傳見貺

道卿詩思清如水披衣霜夜吟寒星意深調苦悲萬古
平明寄與鍾子聽北牕病客爽心骨若飲甘露枯腸盈
嗟夫世故玩形器智者營役奔風霆區畛大小各爾志
不可慕者鴻冥冥吾于世珍粗有覺未逢燭理瘡不鳴
短篇講好聊寫意弱趙安敢當秦兵

小孤山

萬山逶迤起彭澤齊驅擁立江東隅水西平地曠千里

惟此一峯高且孤氣嚴勢峭鬱獨立意不與彼為朋徒
夾水對峙寡當衆衆色媿慘驚頑麤天公結融若有意
以此壯我淮甸無青天長劍倚千丈碧玉大筍巍一株
古今畫工昧好惡峨眉鴈蕩爭為圖方言訛傳楚俗鬼
立廟更以孤為姑我行不暇諭父老正是北風吹舳艫
自福嚴至後洞記柳書彌陀碑

一盂僧粥三鳴雞漸望天角生晴曦積陰凝靄不得肆
蕩滌破散爭紛披清明物象各有職如再開闢平艱危

游人襟韻廓以喜曉指後洞都忘疲小楚亭北望明滅
宛宛一徑微如絲問云般舟道場路從此亭背無險巖
寺久荒寂無足往念有子厚彌陀碑獨趨一里轉巖腹
剝粉敗赤逢門楣村童門闕語嘲啗似云乞米僧未歸
亭亭故碑立青玉覆以老屋疎且敝常嗟古人不可見
尚喜書法存于斯世言書字出心畫體制類彼人所為
子厚少年頗疎雋字合飄逸狂不羈胡為氣質反端厚
至今觀者多有疑或云彼以竄逐久氣志軟熟非前時

又云高才尚薄世故獨立法無所師吾嗟世俗日無理
好惡不正論苦界臆決萬事豈獨此此書何媿人不知
碑陰三百四十字疎瘦勁麗何精奇九十三人姓名具
陳纘寶歷元年題云此柳書一碑者元和三年刊厥辭
至是二月始建立都其事者楊與倪塵蒙壁礙世未見
自我訪尋初愛之嗟物晦顯似有數恨不從事旣與槌
巉巖西山邃無數行及二寺方晨炊東南谿磴斗孤絕
下及平壑如懸梯南朝佛子謂慧海卜庵于此存遺基

鬼神饋食以車運石崖轍跡如在泥智不足以盡萬物
敢決真偽論是非老僧夜語亦有理明發策杖猶遲遲
代書寄文瑩道人

白雲孤起飛杳冥光如片玉輕如冰出山歸山兩何意
行止偶然無滯凝故人浮舟數百里得得訪我湘江稜
二十年間四相遇童顛疎鬢霜各增寒齋笑語極微妙
共以身世均鷓鴣瞥然去矣不我告振錫忽借南風乘
聊一徘徊駐衡嶽遂能放意窮臨登崔嵬老骸不知倦

軟輿蠟屐勤躋升窮巖險谷訪祕怪往往清嘯猿鳥驚
長泉落石響寒玉故意寫在朱絲繩仰揮雲煙斂羽翼
俯聽譽毀真蚊蠅書來所說謂如此而惜攜手無友朋
又云吾廬已堪睡況彼城市尤足憎意若欺我在遷謫
故以勝事用夸矜嗟如予者安足道進退大計兩未能
平生雅志在林壑誤落世紛親繳矰悲吟黃鵠慕越客
謝病高居思茂陵羨子徜徉類雲鵲顧我拘窘如羈鷹
故應題詩遍崖壁曷若寄我勤緘滕山童癡立索書去

寫此安足傾愁膺

春日述懷

祥風靈雨過二月陳根新種苗爭抽早蠶生齊漸如蟻
溫飽指此無歲憂春酒未盡社已過節物又近清明頭
苗裙纈袖事來徃方盤小榼相餉酬田家之樂世皆慕
貴仕難去賤易謀行矣請謝茂陵病一塵一耒歸先疇

崔仲岳鶴舟

綠髻滿頷光且修紫石雙眼寒銍浮茫然襟韻自軒豁

見于聲貌非懦柔昔隨羣衆退禮部歸來便作滄浪遊
笑買漁艇出巧思飾以丹白名鶴舟長鬚赤腳分相與
鱸魚美酒他何求高吟清風洞庭晚一笛明月吳江秋
白雲無心伴疎散丹經有訣窮秘幽志非謗國慕處士
性欲避俗追浮丘不山不淵隱無跡時時飛棹來皇州
保康橋前艤清夢栽冠爛醉都城樓胸中有物齊出處
天下無方隨去留太平取士有階陞幾人年少能公侯
公侯未有君所樂一時外物為贅疣束之簪紳豈其性

軋以利害仍相矛盾嬰稻梁効雞驚馳逐羶穢爭虵蟄
相逢感慨慕黃鵠嗟我方以斗祿囚賤官綬藍誰不爾
應書隨俗卑可羞鶴舟之樂慎勿棄勸君起者非良謀

原注諸公詩勸君棄
鶴舟以就舉故云云

虞城早起道中寄公秉幕府諸友

屋角一夜羣枯號曉來曠野風如刀
戕戕殘雪路摧馬
格格寒氣冰生袍
四支僵痺非我有
況彼鞭鞅難持操
天東朝日凍應澀
亦戀暘谷猶深韜
居常誰不事行役

我行適此時令遭因思都府盛僚友人物一一皆賢豪
想今酣寢夢方足初離密幄驚寒朝左承右侍各以職
氣語蘭臭顏如桃奉持巾匝事盥櫛傳唇澤面供香膏
不容髮綠一點變亟以寶鑷爭除薶炎爐卻坐日當卯
進酒為壽傾葡萄拊鬚束帶欲出戶問訊分付猶忉忉
體舒意適自穩暖泮然盛氣虹霓高此時豈復念寒旅
嗟我勞佚何相遼入趨留守退幕府坐据大案臨諸曹
曹司進若魚在貫文書盈抱紛牛毛爭前鬪敏請莅職

研磨濃墨揮長毫左手鈐前右摘尾落紙葉葉如翻濤
逢姓書字且不給何暇可否知根巢坐中耳目已煩困
庭下敲扑仍喧囂伏膺肱手腕凝脫退食筆硯方能囊
乘除賴有此事在庶幾可以均吾勞人生誤落世網內
區區係累安足逃要之虛中日自靜不使內外相鈎膠
無窮來物彼千萬坐任變化無吾騷崢嶸年華已道暮
不日春意生蘭蒿一搏相與莫相放天下萬事從滔滔
還郭祥正詩卷

李杜酒死詩不作風雅三百年來窮世儒未必甘汨沒
才不迫志終無功汾陽有人字功甫歟然聲價來江東
當時未冠人已識知音第一惟梅翁翁主詩盟世少可
一見旗鼓欣相逢當友不敢當師禮呼以謫仙名甚隆

原注聖俞以君為李白後
身故諸公皆以謫仙稱之

君亦自謂太白出世姓雖異

精靈同姑蘇江水瑩寒鑑江上碧玉排羣峯壯吟豪醉
售佳境日題百紙傾千鍾折腰藍綬豈所樂養親斗粟
曾未充蓬萊幽夢掛寒月青山歸思隨飛鴻書來寄我

三巨軸華絨開破溪雲封駭然按劍覽珠璧恁若赤手
勅蛟龍長吟千言短數百造語險怪神為工四明賀老
忽去世伯牙悲愴閒焦桐嗟予逢子衆人後今其所得
何最豐前日過我北池上正是清露沾高松涼軒坐聽
哆宏辨瀑布千丈懸秋風謫仙有此願自重世俗酣尚
惟纖穠彼其耳目不自信滔滔誰樂聞鼓鐘太上雅意
興禮樂一日鑒賞期至公煌煌帝業子當頌勿歎憔悴
空山中

送蔡景繁赴淮南運使

新堤洛水東風峭，下入長淮春浩渺。
淮南使者蓬萊仙，疊鼓鳴鐃畫船曉。
旦時契闊慕聲名，晚歲綢繆親紉綯。
磨鉛並直登瀛州，對案同廳佐京兆。
青蒿長松慙異質，流水高山喜同調。
雖當倥偬喧囂中，不廢鏘壘與吟嘯。
歲月撲面來紛紛，冠蓋送客聲擾擾。
北園去歲賦紅梅，南浦今春歌碧草。
黃金龍節使光華，白面書生才縹緲。
世高臺閣與省府，偏歷從容譽清劬。
投虛餘刃無足為。

澄清百城付談笑時行有命又有義所遇何多亦何少
未應刻意懷軒裳知有高情在魚鳥黃鵠千歲凌長風
奈此沙邊老鷓鴣朝廷羽儀重人物行聞追鋒賜嚴召
玉音寄我其無忘時有歸鴻下雲表

酬寄

趙郎趁我弛擔初為寄肘後楊炎書盈編專備瘴嶺病
仁及來世功誰如城南老廬有別舍我來埽榻成燕居
坐忘不復一念起寸田自治何須鉏養生防患不知此

從事方藥亦已疎飛鳶未妨隨溪水黃茅正使侵庭除
玄膺晨漱已可飽脯膳況復餘米魚聊將此書一過讀
寄語庶不憂鄉閭

跋覽前此唱和詩卷有詩次其韻

窮不廢詩真技癢筆研風雲日相向聖賢發憤乃有作
三千餘篇自古上荒城誰我同此聲惟有哀猿嘯青嶂
窮人所作誠已難平淡豐腴乃嘉唱橫槊壯氣雖蕭蕭
擊鉢爭先猶行行敢懷修門成怨騷亦防飯顆嘲苦相

江湖千里山千重朝夕供吟紛萬狀閒適非以娛時人
可口甘酸勞醞釀案後詩韻此處缺兩句大兒歸不開卷軸喜我
窮通心已忘種瓜頗欲學東陵醉尉亦從呵故將古人
能輕萬戶侯為有千篇相等量

再作

何事勞心四愁望側身泰山日東向君子九夷猶可居
已謀築室金溪上距江藍輿才兩舍遶郭屏風列千嶂
門中翰墨傳風流自為師友相賡唱曹氏聲名父子間

謝家文章弟兄行古人至樂蓋在斯得意未肯博公相
頓挫萬象歸毫端雕刻丹青盡名狀古風嚴重周廟鼎
小律軟美楚人釀居人惻惻盈錦囊游子篇篇出驚浪
苦心頗恨語不工故實仍嗟老多忘憊休矍鑠空據鞍
銳勇終輸少年將主盟定霸益勉旃少陵勲名何可量
長句送跋之官蘄水

前年東秦夏六月望日拜恩初賜玦降秩削職遷黃州
倉皇束裝三日發故國東平不入城北山一夜辭松栢

親朋問訊若夢寐骨肉分留作胡越論罪豈合有民社
抵讞正欲加鈇鉞仇家之議不盡用天地寬仁日月察
纔令分司置之斬上表謝恩秋已末以御魑魅乃其分
欲居蠻夷聖猶屑斬也雖僻自善地回環山溪富林樾
平生雅志在江湖頗與斬人相締結收拾孥屬已團聚
南北無心更分別白魚煮玉秔炊珠佐以秋菰與春蕨
築室求田雖未就典衣賣裝略無闕大謬不然心已忘
笑人非工已愈拙人生端若夢栩栩事去何庸書咄咄

大兒調邑換江南要雖分房無遠別地劣兩舍不宿春
晨起為書午可達邑四萬戶號難治民雜江閩吏貪猾
鋤彊洗惡勿著意魚逃至清人忌潔化以誠心磨以久
教而後刑不怨殺得聞無毀亦無譽以慰蕭蕭雙白髮

易元吉畫猿

槲林秋葉青玉繁枝間倒挂秋山猿古面睢盱露瘦月
毳毛勻膩舒玄雲老猿顧子稍留滯小猿引臂勞攀援
坐疑跳躑避人去彷彿悲嘯生壁間巴山楚峽幾千里

寒巖數丈移秋軒渺然獨起林壑志平生願得與彼羣
吾知畫者古有說神鬼為易犬馬難物之有象衆所識
難以偽筆淆其真傳聞易生近已死此筆遂絕無幾存
安得千金買遺紙真偽常與識者論

案此詩據聲畫集補入

五言律詩

秋日縣齋

節物秋將半疎慵日益加不為投劾去徒有折腰嗟
味酒懷江鰈乘風憶海槎東籬滿涼露已約伴黃花

九日再招趙湜

夜露感庭鶴秋風吹海槎相思悲歲月寂坐望雲霞終
夕孤蟾魄重陽近落花君無鄙貧令金藥徧陶家

和移居二首

作邑風流在新居卜築完清懽橐書入小隱奉親安日
淡城樓曉霜深園樹寒吏塗何所得試向靜中看
境物生新趣蒿榛失舊墟避塵深戶牖待月廣階除醉
夢飛鴻外吟懷晚雪餘相思歲將晏誰叩草玄居

登徐州城樓

彭城樓上望曠然今古懷山形東負岱河勢下通淮白
鳥孤雲並荒煙萬木排吾觀茲有得興欲拍洪厓

山口

古渡倚雙棹蕭蕭秋色殘山川南去遠風雨北來寒極
望銷魂易清吟得句難依稀故園夢千里下雲端

送曾繹松滋令

粹行完圭璞譚經得聖真青袍尚腰折素蘊喜民親友

益予孤陋官閒子隱淪風騷應賦古亭下蜀江春

次韻耒陽鄒明府庸

初作南冠至隨聞墨綬來猶憐百里遠時見兩鳬回江
日披梅雪春陽動琯灰論文須太白還憶一樽開

泊漢口

大別山前晚維舟望古津孤烟漢川樹長笛武昌人珠
曲今何地蘭洲欲暮春文王嘗美化無復見遺民

舟次胡陵中秋不見月

舟泊古城下重雲埋桂宮舊期今夕負清賞一年空遠
浦依微笛陰崖斷續蟲篷牕強搏酒聊更約秋風

秋泊

寂寞將軍港船頭撞岸蘆寒濤能灌口幽鳥勸提壺水
漲江魚絕秋深野菜無如何晉張翰歸思為蓴鱸

梁澤雨中

點細波鱗淺聲繁客袂涼山煙藏晚翠水荇濯秋香帆
槳無聊國蓑輪自在鄉風騷已多感更欲上瀟湘

次韻楊郎中洙早春

病客疎慵甚江城節物新東風驚柳思暖雪鬪梅春老
信來雙鬢閒愁著一身賤貧非士恥漉酒有陶巾

次韻呂書記堤上見梅花

多病逢多事窮年負物華探春輸野客騎馬看新花南
國稀江信東風恨笛家瓊枝心願見行亦下堤沙

潭州湘陰縣萬氏積慶堂

原注堂在壁旁
以歲時祀享

慶自前人積堂因孝子成惟時傳有後于此事如生喬

木風煙老佳城氣象明謝庭蘭玉盛知不負家聲

送永州黃判官并寄丁郎中

零陵古佳郡山水楚南奇太守逢康樂佳賓得果之
翩漸高陸逐逐就新羈別子東歸去長沙風雨時

唐誦甥二首

唐生四方志投筆慕前人此日免魚腹異時觀虎臣
茅柴酒亦美玉縷鱸應珍莫恨衣都典歸來是早春

因滯江州久謂為千里遐欣曾逢漂母幾欲賣朱家癡

坐瞻雙櫓東行負九華歸須談旅瑣勿作勝遊誇

次韻聖和秋夜對月

綠桂西風老金波玉氣明清霜酣夜色羣籟息秋聲毛
骨無遺照關河共遠情十年吟塞曲畫角厭悲鳴

病起酬聖和

安佚失于恃病邪乘所虛遂嬰漳浦卧便憶茂陵居幸
爾筋骸立頽然鬢髮疎煩君山柏句慰此不材樗

留符離待鄉信未至

先隴封楸後羈臣賜玦時放舟初草草去國合遲遲珠
滑新粳粒金酣早蟹脂南遷真不負屈子獨何知

豐齊道中

路遠程難計人慵馬自遲草蛛橫布網桑蠖亂垂絲村
落黃梁飯牆籬紫菊枝時豐物皆好客思在青旗

送王子正寺祥斷

君仕本儒雅故宜京國游官趨廷尉府心異法家流白
草侵寒驛清霜拂曉裘行行句應好雲日望神州

小駟送錢中道

老馬久勞力主人真寡情
知非換妾去頗作戀軒鳴
楚豆不為薄江芻無限生
誠能懷舊德時借爾山行

次韻王仲達龍圖

常慕詩之學今逢將者才
諷吟真嘖炙畏默若銜枚
天地秋風老江湖醉夢回
韶英方合奏難使擊轅陪

早行寄田七

鞍馬三更夢江湖萬里心
辨途聽犬吠占曉望橫參
浩

欽定四庫全書

史詩集
卷十六

露濡衰鬢微風動醉襟輸君正酣寢
鼾鼻沸雷音

原注
君善

軒

簡定國

原注時以
目疾在告

原子貧非病張生心不肖興隨緣自足
嬾與拙相成竹
葉疑無分金徽尚有聲幽懷誰晤語空
此望東城

送席汝明

得子固已晚嗟予材滯頑義合乃朋友
不在疎密間江
關東風冷梅披臘雪慳扁舟共春色
相約到淮山

送計希顏

翩翩遠遊子驅馬亂山岑
丹穴飛鳴處高堂日夜心
春風巴峽曉晝霧楚城陰
家世文章事仙臺紫桂林

題貴池亭次蹈韻二首

一夜山南雪清寒江上州
年華隨水去客興為魚留
聞鴈思湖表看梅寄隴頭
檣烏風信好紉鼓洞庭舟
魚味年年美何須問舊池
江山清不改陵谷變難知
節物驚冬至蕭條使客悲
謫仙游賞地空有白猿詩

丙子元日三首

瑞歷開三朔祥風驗八方
年華恨催老節物喜隨鄉
鬱壘須時設屠蘇獨後嘗
佳辰誰與醉夢繞故溪傍

爆竹驚山鬼雕幡戴楚冠
祝延千歲酒練氣五辛盤
江冷東風外天回北斗端
羌城霖雨甚從此看春寒

遙想千冠佩朝元太極天
鳴鞘開殿戶索扇起鑪煙
慶事通祥表和聲入樂懸
江湖祝堯意仁壽萬斯年

和吳端甫書懷

舊學驚心在窮居惜鬢華詩書憑淨几水竹抱鄰家霜
雪巴西夢風波楚北嗟知君厭留滯我亦正塵沙

二月二日

江鄉春值閏二月似深冬雪濕妨挑菜雷寒未起龍雞
蟲閒得失蠻觸小交攻稍覺雲天霽西山上翠峯

送僧懷善

獨鶴翩無累孤雲晚倦飛羣山帶江處一錫背塵歸妙
學窮神祕高懷熟世機漳濱多病客空此望巖扉

過桑八墓

夫子能詩者寒吟四十年于今傳好句無處訪遺編古
意哀東野窮愁死玉川惟餘北山塚松柏鎖秋煙

寄長吉孫二首

別爾忽經歲言歸欣好音神清率更瘦學苦鄭玄心竹
徑依山遠沙溪過雨深世科思汝父即已御祥琴
賞罷盧溪菊來尋楚澤春蘭舟逾百日椒酒值佳辰勉
爾青箱學寬吾白髮人小園遊息地松竹更相親

次長庚孫自汶寄詩韻

近就陶家舍扶疎草本周頗移蘭就水已計竹為樓飲
食隨宜足光陰任自流爾曹來伴老日問下江舟

輓慈聖光獻皇后二首

四紀坤儀正三宮冊號尊蚤還明辟子坐見太平孫治
誥遺神几殿衣出寢門如何天下養難駐白雲軒

聖孝心崇報宮庭詔屢頒喪期逾易月陵兆改因山已
想天人樂猶睎藥使還蟠桃舊亭上時節壽觴間

輓濮安懿王任夫人二首

自昔商任貴于金慶裔光來嬪周季歷有子漢宣皇
玉輝幽竈車雲擁畫裳哀榮無所憾新廟五陵旁
鹵簿三川晚佳城一品尊翟衣新綬命神寢舊王園
淒斷風鈴遠青蒼霧蓋昏從今知聖作大義稱私思

輓大行太皇太后三首

四裔柔懷外羣生惠澤中簾闈九年政覆載一心公
馬鄧徒聞儉姜任詎有功風雲黃道靜杲日上天東

典禮辭先后恩私杜外門虛心延衆正損上益羣元仙
路山川近徽音四謚尊賓天去何恨聖孝託神孫
夕月沈金殿秋風冷玉衣臨當復明辟忽自厭繁機藥
使來何暮嵩呼數已非孤臣恩未報泣望國西畿

輓中書侍郎懿獻傅公二首

里閭推前輩臣鄰接近班深心語默外大節險夷間付
託龜趺字哀榮馬鬣山遙知濟源第風月草堂閒
公昨初移疾予方丐一麾尋聞升屋告適是出關時零

欽定四庫全書

忠肅公
卷十六

落孤龍友

原注公與予及故孫
華老最善約為三友

綢繆記鳳池白頭懷抱

事西望不勝悲

輓右光祿大夫知樞密院事贈開府儀同三司孫

公二首

岑令神情竭裴公柱石衰國貪黃髮舊身負赤松期人
也將安仰天乎不慙遺延和聽詔語深見兩宮悲

樞極元豐議人猶記話言載來籌廟幄遂見偃戎軒一
品哀儀重三司錫命尊綢繆承晚契揮涕望西原

輓司空文定張公二首

德業文章事公平取數多雖驚壤梁夢會有望門歌人
贖心徒爾舟移古奈何青編如可託後世看巍峩
澹泊環中妙超遙物外仙百年從委蛻一匱戢彌天晚
契承知己遺風在象賢東橋松柏路不得望新阡

輓司空贈太師申國呂公四首

元祐飛龍日淮南卓馬歸周人瞻赤舄鄭國賦緇衣曠
度銷羣異清言析萬微方依泰山重俛仰失巍巍

衡鏡公多士著龜信兩宮羣生遂耕織四海戢戈弓奪
去天何速藏深壑已空渾渾新府第東閣閉春風
玉輦躬臨奠金錢詔治喪祔宮周尚父世爵漢扶陽位
席虛羣望松阡竈舊藏門中蘭玉盛有以慰思皇
歲有懸車表新聞曳杖嗟風雲四朝仕公相百年家故
國山川近西郊鼓吹譁旂常難盡記膏澤徧幽遐

哀魯國宣靖曾公三首

柱石三朝重軒裳五紀榮忠勲等張霍善慶似韋平光

氣收辰象儀型失老成易名宣合靖千古詔幽明
鼎鉉調元久貂冠就第閒朝廷方憲老夢寐忽顏山白
日佳城啟東園祕器頒深宮那可見桃李在人間
不憚天何理云亡國所嗟還應騎列宿但說去流沙清
廟陪烝享鴻樞見世家悲風溱洧路哀咽滿簫笳

哀光祿王卿二首

天驥騰長坂秋鴻御順風俄從絳衣使不待黑頭公志
蘊留家集光華掩竈宮惟餘善人報流慶在無窮

義直中能恕才高氣不矜衆人疑白璧吾道信朱繩
勲業無天命文章有子興冥冥何可詰萬古一丘陵

哀太尉惠穆公三首

弈世承圭袞三朝侍冕旒臨邊晉羊祐坐幄漢留侯
樂易門多士幾深廟有謀那知天不憖俛仰一山丘

四塞宣皇武殊庭遠世機如何梁木夢不待袞衣歸
門戶傳蘭玉忠勲載鼎旂空餘殿楹字鸞鳳五雲飛

望履鴻樞府熙寧始識公容無高位氣語有大臣風
感

慨方山仰驚悲已壑空緇衣國人意轉入薤歌中

哀應真李先生三首

名教心為樂逍遙志自求遂成君子隱初異道家流風
月閒三楚巾裳付一丘空餘清泰院雲蘚舊巖秋
節行幽人正林泉隱者居忽歌東魯夢未上茂陵書世
變還舟壑門宏待駟車衆哀無以致為託輓聲紆
生死心先達康寧壽亦遐令威成白鶴老子去流沙妙
意傳琴祖微言補易家試觀餘慶後簪紱已光華

欽定四庫全書

忠肅集
卷十六

二十七

輓秦國夫人三首

原注 安
厚卿母

久被三宮眷誰知五福純
脂田天府國綵服斗樞人
枕夢華堂晚仙期碧海春
尋常居養地悄悄繡簾塵

賻祿來中禁簫笳去國門
素冠空列鼎白髮但歌盆
彤管音徽盛甘泉像貌尊
所傳天下勸豈獨慰兒孫
夫榮子方貴全慶獨乖離
畫靜蘭羞歇秋高薤曲悲
晴雲縈壽隴霜日照銘旗
無復升堂拜空餘執紼詞

忠肅集卷十六

欽定四庫全書

忠肅集卷十七

宋 劉摯 撰

五言長律

縣齋歲晚寄萊蕪田同年

原注數
字直傷

西北東南邑相望
歎索居音塵路千里
契闊歲三除
薄宦隨羣衆
平生媿拙疎
茂陵將謝病
中散不便書
燕澤歸鴻盡
東山晚雪餘
江湖勞夢寐
風土污簪裾
塵卷吾

欽定四庫全書

忠肅集
卷十七

成癖囊詩子富儲孤懷吟劍鐔舊跡夢崑墟今古看毫
髮功名賸贅疽何時拂衣去相與醉鱸魚

渚宮

坤腹疏靈境蓬宮抱故城清風百年內芳草幾番平樹
色埋危屋湖光泛彩楹真游三島近仙界一壺清外慮
隨塵隔虛懷敵水明松筠烟翠老臺榭綠苔生敲枕巫
雲近披襟楚吹輕舟橫疎柳靜橋卧晚波晴事往空歌
嘯人閒自醉醒我來真漫興魚鳥莫多情

慨方山仰驚悲已壑空緇衣國人意轉入薤歌中

哀應真李先生三首

名教心為樂逍遙志自求遂成君子隱初異道家流風
月閒三楚巾裳付一丘空餘清泰院雲蘚舊巖秋
節行幽人正林泉隱者居忽歌東魯夢未上茂陵書世
變還舟壑門宏待駟車衆哀無以致為託輓聲紆
生死心先達康寧壽亦遐令威成白鶴老子去流沙妙
意傳琴祖微言補易家試觀餘慶後簪紱已光華

輓泰國夫人三首

原注安
厚卿母

久被三宮眷誰知五福純
脂田天府國綵服斗樞人
枕夢華堂晚仙期碧海春
尋常居養地悄悄繡簾塵

賻祔來中禁簫笳去國門
素冠空列鼎白髮但歌盆
彤管音徽盛甘泉像貌尊
所傳天下勸豈獨慰兒孫

夫榮子方貴全慶獨乖離
畫靜蘭羞歇秋高薤曲悲
晴雲縈壽隴霜日照銘旗
無復升堂拜空餘執紼詞

忠肅集卷十六